

Izar naiz euzki, atseden barik,  
usain, argi ta doiñuz nastean,  
gogora dakar zerua,  
aren ederrez muiñea daula  
osoan birloratua.

### ARGI - SEMEA

«Ecce Virgo concipiet, et pariet Filium»  
(Isai, 7, 14)

### Ibaia

Jaunak zorion-baratz erdian  
ipiñi ninduan samur.  
Uretan sotil, zero osoa  
lepo-gaiñ dakart antzikur;  
zoramenezko zugatz ezeak  
biran ditut buru-makur,  
otzikara ta eltxun dardarti,  
zenbait nai nire oe ur.

### Ostargia

Zur da mendian artzain gaztea,  
zur itxastarra ontzian,  
illuraz doan ikuskizuna  
izanik begi aurrean.  
Euzki zarraren suzko moskola  
ager orduko ur atzean  
aurlari nator ni zero-gangan,  
soiñeko zuri-gorrian.

### Larrosa

Eundaka liliz inguraturik  
baratz-munean naukazu,  
ogei urteko neskatxa iduri,  
lirain, pertxeta, dizditsu;  
illargiaren zidar-izpiak  
morgil au dautzu lo-leku,  
geldi ezin dan aize txoliñak  
ekaitz orduan gordaillu.

### Lar ixioa

Gauza kaxkarra izanagaitik,  
ba-dot naiko illarrain-zio.  
Larra naz Oreb mendi-gerrian,  
ta Goikoak nau ixio;  
sua darist, ta kiskaldu barik;  
Jaunari esker nakio...  
Ta bardintsu, ni onan ikusiz,  
Mois'ek be agur dagio.

### Noe'ren kutxa

Uiol. Ur-giltzak ortzian eten:  
Iurrik dardar, gizona zurbil;  
zezen antzera, orruz itxaso...  
Au bai triskantza ta naspil!  
Ni, orraitio, ur apartsu zear,  
itxaro-argia dingil,  
bizidun oro suntsitu arren,  
ez nintzan nastean murgil.

### Mailiadia

Mailladi nozu, bardiñik eza,  
urrezko laiño bitsean;  
lurrean dodaz oin biak tinko;  
burua barriz ortzean.

Gora ta bera dabilz gotzonak,  
Jauna dala gaillurrean.  
Onen jakitun Jakob egin zan  
bide ertzeko amesean.

1946 / 1950

**Judit**

Jaunak indartu eustan besoa,  
Jaunak biotza dardartu;  
eta gauerdi odoltsu baten,  
arturik bere aolku,  
Olopernes'i ezpataz neutson  
samea sastaka moztu:  
len otseiña zan erri maitea  
betiko neban azkatu.

**Isai igarlea**

Mailladi, kutxa, lar, ostargi, ibai,  
zer zarie, iduri ezik?  
Sakon-sakona eritxi arren,  
ez diñotzuet guzurrik:  
Ama ta Birjiñ batera danak  
—goi-alak eztau eziñik—  
Argigandiko Argi-Semea  
ara erraian sorturik.